

Filipenses

Peresugue árĩgu ipũre gojabeopu Pablo

¹ Gũa Pablo Timoteo mera Jesucristo pohro majarã ãhraa. Eropirã árĩpeherrerãre mũare ãarãre Jesucristo yarãre Filipo majarãre gojabeoa gũa. Mũa oparã sãre mũare itamurã sãre gojaa. ² Eropirã Goãmũ mari Pagũ mari Opũ Jesucristo mera mũare ãadorea. Ígu itamuri mera ãaro árĩque mũa.

Pablo Jesu yarãre Goãmũre serẽbasapu

³⁻⁶ Goãmũ mũare ãaripũre gohrotocũ iigu iimi. Eropigu mũare ígu iinũgadiro dopa ta ii ojo-gorocũgũcumi. Eropirã Jesucristo i yebaguere ígu eracũguere ñeri marirã árĩrãca mũa. Negohraguere Jesu yarã mũa wara pũhrũ, dohpague sãre itamua mũa yũre ãari buherire yũ buhecũ. Mũa eropa iirã árĩcũ Goãmũre “Õhaa,” arãa yũhũ. Mũare guñagu õpa dihta arãa yũhũ. Mũare Goãmũre serẽbasagu mucubiriri mera serẽbasaa. ⁷ Eropigu mũare yũ ãaro mera eropa pepicũ ãapũrica. Õari buherire “Diaye ta ãhraa,” oparãre yũ arĩtarinũgacũ mũa yũre itamubũ. Iri buherire diaye ta iri árĩrire masare yũ werecũ itamubũ mũa. Peresu yũ árĩcũ sãre itamubũ. Eropa mũa itamucũ mari yujuro mera Goãmũ itamurire opaa. Eropigu yũ sĩporã mera turaro mahia yũhũ mũare. ⁸ Jesucristo ígu mahiri mera bũrigã mũare guñaa yũhũ. Yũ

eropa guñacũ Goãmũ irire masimi. ⁹ Mũare õpa arĩ serẽbasaa yũhũ Goãmũre. Goãmũ yare õaro masiri mera õaro pee masipehori mera Goãmũre masa sãre mũa mahinemoburire serẽbasaa yũhũ Goãmũre. ¹⁰ Õarire mũa masiburi sãre serẽbasaa mũare. Mũa eropa masirã Cristo i yebague ãgũ dujaricũ õarire iinirã árĩrã, dipuwaja marirãca mũa. ¹¹ Eropa õarire iirã Goãmũ gamerire iirãca mũa. Eropa iimorã wacũ iigũcumi Jesucristopũ mũare. “Goãmũ õagũ, turagũ áhrimi,” árĩpehrerã ãgũre erã arĩ umupeoburire ãgũ gamerire mũa iicũ iigũcumi mũare.

Pablo Jesucristo yagũ ãgũ warare werepũ

¹² Yũ acawererã, ire mũa masicũ gahmea. Yũ dohpaguere peresu yũ árĩquerecũ ta õari buheripũ eropa mũhtaniguicãa. ¹³ Eropigũ Cristo yagũ yũ árĩri waja peresu yũ warare masipehrema opũ ya wihi majarã surara. Árĩpehrerã gajirã sã õre irire masima. ¹⁴ Eropirã peresu yũ árĩcũ ãarã, bajarã mari acawererã Jesu yarã mari Opũre Jesure umupeonemoma. Eropa umupeorã gũiro mariro õari buherire gajirãre buhema erã.

¹⁵ Yujurãyeri Cristo yare buhebonirã árĩquererã yũre ãhaturima. Cristo yare buherã erãpũre masa ãhasuacũ gahmema. Gajirãpũ õaro mera Cristo yare buhema. ¹⁶⁻¹⁷ Õari buherire yũ werenigui turaburire Goãmũ yũre ãgũ apirare õaro masima. Oãpũ eropa masirã yũre umupeorã Cristo yare buhema. Gajirãpũ yũre ãhaturirã masare erãpũre ãhasuacũ

gamerã Cristo yare buheama. Eropirã yu peresu árĩcũ erã yure bujawerecũ iidiana. ¹⁸ Ōaroca. Cristo yare ta buherã iima. Erã yure umupeobiriqererã Cristo yare buhema. Gajirãpũ ðari mera buhema. Árĩpehrerã erã ĩgu yare buhecũ mucubiria.

¹⁹ Eropigu mucubiriniguicãgũca yũhũ. Goãmure mũa yure serēbasara mera, Jesucristo ĩgu Espĩritu Santo itamuri mera Goãmũ yure ðaro taricũ itamugũcumi. Irire masia.

²⁰ Ōpa ta bũrigã iidiaa yũhũ dohpa. Ne yu iirare ñero pepidiabeaa. Ñero pepibigu árĩgu doyarõ mariro árĩgũpũ masare Cristore ðaro umupeocũ bũrigã iidiaa. Ŭmuri nũcu yu iidiro dopa ta dohpague sãre erã Cristore “Ōagũ, turagũ àhrimi,” erãre arĩ umupeocũ iidiaa. Ojocarigu gohra eropa ta iidiaa. Erã yure wejēdiaquerecũ ta eropa ta iidiaa.

²¹ Ojocariniguigu gohra Cristo yare iiniguica dohpa. Sĩrigũgue tamera ojocarirã tauro ðaro dujagũca yũhũ. ²² Ojocariniguigu Cristo yare yu iinemoboro dopa ojocariniguicãdiaca. Eropa iidiaqueregũ ta sĩriri sãre gahmea. ¿Dipũre yu gamebocuri? Masibirica yũhũ. ²³ Yu ðpa arĩ wereniguicũ masisũya mara yure. Cristo mera bũrigã árĩdiaa. Eropigu dohpaguere ĩgu pohroge wadiaca. Ojocariri tauro sĩriripũ ðatarinũgacãroca. ²⁴ Eropa árĩquerecũ ta mũare yu itamuboro dopa ojocarinemoro gahmea yure. ²⁵ Irire masigu ohõ mũa mera yu árĩborore masia yũhũ. Eropa árĩniguicãgũca yũhũ mũa Cristore umupeonemoboro dopa,

iri umupeoturari mera mũa mucubiriborore.
²⁶ I yebague árĩnigũ mũa pohrogue dipaturi
 yũ wacũ mũa mucubirirãca. Eropa yũhũ mũa
 pohro ejacũ Cristo Jesu yũre ĩgũ itamurire
 masirã, “Turagũ ãhrimi ĩgũ,” arĩ umupeorãca
 mũa ĩgũre.

²⁷ Dohpaguere i dihtare iique. Cristo ya buheri
 iri arĩro dopa ta árĩricũque mũa. Guñaturarã
 árĩque. Eropirã game dũca wariro mariro ðari
 buherire yujuro mera bũrigã buheque. Eropa
 ta yũ mũa pohro wabiricũ sãre yũ wacũ sãre
 mũa eropa iicũ gahmea. Eropa mũa yujuro
 mera árĩrã árĩcũ peebeodiaa yũhũ. ²⁸ Mũare
 ĩhaturirãre gũibiricãque. Mũa eropa gũibiricũ
 ĩarã Goãmũ yarã mũa árĩcũ masirãcoma erã.
 Eropa masirã erã peamegue waboro sãre
 masirãcoma. Eropirã Goãmũ ĩgũ tauboro sãre
 masirãcoma. Ōpa ta masicũ iimi Goãmũ masare.
²⁹ Cristore mũa umupeobure Goãmũ apidi árĩmi.
 I sãre apidi árĩmi. “Cristo yare mũa werera waja
 ñero tarirãca,” arĩ apidi árĩmi Goãmũ mũare.
³⁰ Eropirã Cristo yarã mũa árĩri waja gajirã
 mũare ñero iima. Mũa erã iidiro dopa ta yũ
 sãre ñero iima erã. Mũa mera yũ árĩcũ yũre erã
 eropiicũ ĩabũ. Dohpague sãre erã yũre eropiicũ
 pee waĩcũca mũa. Eropirã mari yujuropa ta ñero
 taria.

2

*Cristo bu árĩgũ iro dopa eradigũ árĩpehrerã
 weca opũ árĩbu warũ, arĩ gojañumi Pablo*

1-2 Cristo mũare õaro sĩporãcũcũ iinirã, Cristo ãgu mahiri mera mũa mucubirirã, yũpũre õaro mucubiricũ iique. Eropirã Espĩritu Santo arĩpeherrerã mũa mera ãgu arĩcũ gajirãre mahirã, mojomoro ãarã arĩrã, yũre õaro mucubiricũ iique mũa. Ire mũa iicũ mucubirigũca. Yujuropa ta õaro sĩporãcũque mũa. Eropirã mũa basi game mahique. Õari mera arĩricũque. Eropirã arĩpeherrerã yuju diaye õaro arĩque. ³ Gajirãre tarinũgadiarã arĩbiricãque. Eropirã eropa ta pepi arĩcãque. Eropirã gajirãre õaro umupeo õpa arĩ pepique: “Erãpũ yũ tauro õarã ãhrima,” arĩ pepique. ⁴ Gajigu gajirãre itamudiabiri-bocumi. ãgu iro dopa iibiricãque. Gajirã sãre itamuque.

⁵ Jesucristo ãgu eropa pepicãdiro dopa ta mũa sã eropa ta pepicãque. ⁶ ãgũpũ Goãmũ gohra arĩqueregũ ta “Goãmũ yũ arĩrire ne duhosome yũhũ,” arĩbiripũ ãgu. ⁷ Eropigu ãgu Goãmũ ãgu arĩrare duhu, masũ ta masa dehyoadigu pohro majagu iro dopa arĩnũgapũ i yeba-guere. ⁸ Eropigu ãgu masũ dũpũcũgu bu arĩgu gohra arĩnũgapũ. Eropa arĩnũgagu “Crusague wejẽque ãgure,” erã arĩcũ ãgu Goãmũre yũhrigu tarinũgabiripũ. Crusague ta gũhyasiuro mera sĩribu arĩqueregũ ta ãgu tarinũgabiripũ ãgu Pagure. ⁹ Eropigu ãgu eropiicũ ãha mari Pagũ arĩpeherrerã masa erã umupeobure apipũ Jesure. Eropigu arĩpeherrerã gajirã weca opũ acupũ Goãmũ ãgure. ¹⁰ Eropirã arĩpeherrerã umaro majarã, i yeba majarã, sĩrinirã mũra sã Jesu waĩre peerã erã mereja muju ãgure umupe-

orãcoma pare. ¹¹ Eropa ïgure opu acugucumi mari Pagu árïpehrerã Jesucristore “Mari Opu ãhrimi,” erã arïbure. Eropa arïrã mari Pagu Goãmure umupeorãcoma.

Cristo yarã òarire wererã masare masicũ iima

¹² Eropirã, yu mahirã, mua mera yu árïcũ mua yuhridiro dopa ta, dohpaguere yu yoarogue árïcũ sãre òaro yuhrique yure. Eropirã peamegue wabonirã mua Goãmũ taunirã árïrã Cristo ïgu itamuro mera ïgu gamero dopa ii purumujuque. Eropirã umupeori mera biraro mariro Goãmũ yare iique. ¹³ Goãmũ òaripure mũare gamecũ iigu iimi. ïgu eropa gamero dopa ta mua iiborore iimi. Eropigu irire mua ïgu yare òaro iiborore itamuniguicãmi Goãmũ. ïgu eropa iicũ irire yu arïdiro dopa ta iique mua.

¹⁴ Árïpehrerire iirã turiro mariro, mua basi gajinore werericuro mariro iique. ¹⁵ Eropiique mua ñeri dipuwaja marirã, ñerire iibirã Goãmũ porã òaro mua árïmorã. Eropiique mua masa guyarã, ñerã watopere goroweoro mariro mua árïmorã. Erã ñerã watope mua árïrã òari buherire buherã masicũ iiaa mua i yeba majarãre. ¹⁶ Iri buherire mua peeñanirã Goãmũ mera eropa árïniguimorã wabu mua. Iri buherire i yeba majarãpũre mua eropa buhecũ ïagu mua mera mucubirigũca yũhũ. Eropigu yu mũare buherare guñagu, “Bu gohra ta mũare buhebiriya yũhũ,” arïgũca yũhũ. Eropigu Cristo ïgu i yeba ïgu dujaricũ mua mera mucubirigũca yũhũ. Eropigu guhyasiuro tarisome yũhũ. ¹⁷ Cristore mua umupeoturacũ Goãmũ

mũare ñhasuagucumi. Īgu eropa ñhasuacũ ñagu mũare Cristo yare yũ buheri waja yũre erã wejẽdiaquerecũ ta mucubirigũra. Eropirã mari árĩpehrerã yujuropa ta mucubirirãca. ¹⁸ Eropã ta mũa sãre yũ mera mucubiro gahmea pũhrũ yũ sĩricũ ñarã.

Timoteore, Epafrodito sãre wererũ Pablo

¹⁹ Mari Opũ Jesu ĩgu gamecũ yojaro mera Timoteore mũa pohroque obeodiaa yũhũ mũa árĩricũre masibu. Eropã masigũgue ta mucubirigũca. ²⁰ Īgu Timoteo mũa õaro árĩborore diaye ta burigã guñami mũare. Gajigũ ĩgu iro dopa ta árĩgu marimi yũre. ²¹ Gajirãpũ árĩpehrerã erã gameri dihtare iidia, Jesucristo ĩgu gameripũre iidibeama. ²² Timoteopũ ĩgu õaro iirire masia mũa. Yũ magũ iro dopa ta árĩgu ĩgu yũ mera õari buherire weremãrimi. Eropirã gũa yujuropa ta Cristo yare buhemũrabũ. ²³ Eropigũ õ majarã oparã yũre erã duhpiburire masira pũhrũ, Timoteore mũa pohroque obeodiaraa. ²⁴ Eropigũ mari Opũ Jesu ĩgu itamuri mera yojaro mera yũ sã mũa pohroque wagũca.

²⁵⁻²⁶ Yũre itamudorerã mũa Epafroditore obeoabũ yũ pohroque. Īgu yũ acaweregũ, yũ mera mohmegũ, yũ wapi, Goãmũ yare buheturagũ ãhrimi. Īgu mũare turaro guñabeomi. Eropigũ ĩgu dorecũrãre mũa peecũ masigũ ĩgũpũ “Erã yũre guña bajawerecoma,” arĩ guñaricũmi. Eropã ĩgu wũaro guñaricũcũ ñagu ĩgũre mũa pohroque omedujuro gahmea yũre, arĩ pepia yũhũ dohpaguere. ²⁷ Árĩro

ta ĩgu turaro dorecũami. Mero sĭribocuri tarami ĩgu. ĩgu eropa dorecũquerecũ ta, Goãmũ ĩgũre mojomoro ĩagu taricũ iiami. ĩgu sĭricũ yũpũ bũrigã bũjawereboaya. Eropigũ yũ sãre Goãmũ mojomoro ĩami ĩgũre taricũ iigu. ²⁸ Eropigũ dohpague tamerare yojaro mera ĩgũre mũa pohrogue obeodiaa dipaturi mũa ĩgũre ĩha sĭñajaboro dopa. Mũa eropa mucubiricũ peegu yũ sã mucubirigũra. ²⁹ Eropirã ĩgũre Epafroditore mari Opũ yagũre õaro mucubiriri mera bocatĩrique. Eropirã gajirãre ĩgu iro dopa árĩrãre umupeoque. ³⁰ ĩgu Cristo yare itamudiagu sĭrirami. Mũapũ yũre itamumasibiricũ ĩgũpũ yũre itamubasamũrami. Eropigũ dorecũ sĭrirami ĩgu.

3

Õaro árĩri gohrare wereñumi Pablo

¹ Dohpague tamerare ire weregũra. Mari Opũ mera mucubirique. I buherire ero coregue yũ wererare dipaturi õpa arĩ gojabeogu mucubiria yũhũ. Eropigũ ire werenemogu itamugũ iiaa mũare. ² Gorowerebirã ta árĩque mũa. Ñerire iiniguicãrã, diayea iro dopa ta árĩrã, ñerã, gasiro merogã wiri aĩdorerã mũa ya dũpũre wiridiana. Eropa iidorerã árĩcũ ĩha “Queoro buheri árĩbeaa,” arĩrã õaro iique mũa. ³ Erã circuncisión gasiro merogã aĩdoreciarã “Deyoro maja mera Goãmũre umupeocũ õhaa,” arĩrima. Maripũ eropa arĩbeaa. Espĩritu Santo ĩgu itamuri mera diaye ta Goãmũre umupeoa mari. Mari deyoro maja iiri mera mucubirĩbeaa. Jesu

yarã mari árĩri mera mucubiria mari. ⁴ Eropa mucubiriquerẽgũ ta, yũ iirare erã iro dopa arĩdiagũ, erãre docapicãboya yũ sã. Gajigũ õpa ta arĩ tarinũgacãdiami. Yũpũ ãgũ tauro eropa árĩboaya. ⁵ Õpa iigũ árĩribũ yũhũ: Ocho nũri yũ masa dehyoara pũhrũ gasiro merogã wiri aĩnirã árĩma yũre. Israe masũ árĩgũ Benjami ya curu majagũ ãhraa yũhũ. Yũ pagũ sumarã hebreo masa erã árĩcũ diaye ta hebreo masũ gohra ta masa dehyoabũ. Moise dorerire diaye ta iipehodiagũ fariseo curu mera ñajaribũ yũhũ. ⁶ “Goãmũ ya árĩsaca,” arĩgũ õaro iiribũ yũhũ. Eropigũ Jesu yarãpũre ñero iimũricarabũ yũhũ. Diaye ta Moise dorerire iigũ irire tarinũgare mariro iipehomũrribũ yũhũ. ⁷ Iribojeguerẽ “Iri õari árĩsaca,” arĩ pepimũrribũ. “Iri yũ eropa arĩ pepira iribojegue yũ eropa árĩra duhpiburi árĩbirigohracãdiro árĩbũ,” arĩ pepia dohpaguere. Õpa ta arĩ pepinũgabũ yũhũ Cristore umupeonũgagũ. ⁸ Jesucristo yũ Opũre yũ masicũ tamerare õataria. Eropigũ gajĩ doreripũre duhpiburi árĩbeaa, arĩ pepia yũhũ. Iri árĩpeherrerire cóãcãbũ Cristo yapũre iibu. Eropigũ iribojegue yũ iirare cóãgũ “Ñeri gohra ãhraya,” arĩ pepia. Cristo yare õaro masibu ãgũ mera majagũ árĩbu eropa pepia. ⁹ Eropigũ yũ ejatuharo õaro yũ iira waja “Õagũ ãhrimi,” arĩ ãabeami Goãmũ. Eropiro Goãmũ dorerire Moiserẽ ãgũ apirare yũ iira waja sãre “Õagũ ãhrimi,” arĩ ãabirami. Cristore yũ umupeora pũhrũ “Õagũ ãhrimi,” arĩ ãami pare ãgũ yũre. Goãmũpũ marire dipuwaja marirã árĩcũ iimi ãgũre mari umu-

peocã. ¹⁰ Eropigu ero coregue yu árĩmũhtarare duhucãbu Cristore ðaro masigu wabu. Goãmu ïgu turari mera Cristo masa mũriapũ. Iri turari mera árĩdiaca yũhũ. Eropigu iri turari mera ðarire iidiaca. Cristo crusague sĩripũ mari ñeri iirare cóãbu. Eropigu ïgu yare iigu ïgu iidiro dopa ta ñero taridiaa yu sã. ¹¹ Eropigu Cristo ïgu masa mũriadiro dopa ta, yu sã masa mũriadiaca.

¹² I árĩpehreri eropa arĩgu “Cristo iro dopa ñeri marigu árĩtuhajaa,” arĩ pepibea. Yu eropa arĩ pepibiriquerecũ ta Cristo ïgu yagu árĩbure ðagu árĩbure iiami yũre. Eropigu ïgu yare ïgu sãre ðaro masinemodiagu turaro mera ïgu yare iidiaa yũhũ. ¹³ Yu acawererã, yũhũ mũare eropa arĩgu, “Jesucristore ðaro masipehotuhajaa yũhũ,” arĩgu iibeaa. Eropa arĩbiriqueregu ta i tamerare iiaa. Yu iribojegue iirare cãdijigu dohpaguere “¿Goãmu dohpa iicũ gahmeri yũre?” arĩgu burigã irire iidiaa. ¹⁴ Omabiragu pohbegu ejamũhtadi ïgu wajatadiaro dopa ta burigã iiaa yũhũ yu wajaborore yu ñeaboro dopa ta. Cristo ïgu yagu yu árĩcũ ïagu yũhũ wajaborore obu umarogue sihubeomi yũre.

¹⁵ Õpa yu arĩro dopa ta pepique mũa sã Cristore ðaro masirã árĩrã. Eropirã mũare yu wererare mũa peediabiricũ gajiropa mũa pepicũ Goãmu mũare ðaro masicũ iigucumi. ¹⁶ Eropirã ïgu yare mari masirare ðaro ii ojogorocũrã.

¹⁷ Yu acawererã, mũa árĩpehrerã yũre ïhacũque. Eropirã gajirã guu iiro dopa iirãre ïhanũũque mũa erã sãre mũa ïhacũboro dopa.

¹⁸ Bajasuburi gajirãre ñerãre wereabu yũhũ

mũare. Dohpague sãre buriġã bujawereġu erãre ta werea mũare daja. Erã ñero iiri mera “Cristo crusague iġu sãrìdi árĩmi,” arĩ buherire ìhaturirã àhrima. ¹⁹ Erã peamegue wamorã ta àhrima. Erã ùaribejaripũre buriġã gahmema. Eropirã iri mũare ġuhyasĩrisãborare erãpũ “Mari iiri õari àhraa,” arĩma erã. I ùmũ maja dihtare pepima erã. ²⁰ Maripũre mari ejaburi maca ùmarogue ta àhraa. Eropiġu erogue ta marire taubu mari Opũ Jesucristo dujarigũcumi. Eropirã iġu dujariborore corerã iiaa mari. ²¹ Iġu dujarigũ mari dũpũre bu árĩri dũpũre gajiropa árĩri dũpũre gohrotogũcumi iġu. Eropiġu iġu ya dũpũ iro dopa ta õari turari dũpũre gohrotogũcumi marire iġu turari mera. Árĩpehrerã opũ ñajami iġu iri turari mera. Eropiġu árĩpehreri Opũ àhrimi iġu iri turari mera.

4

Èmũri nũcũ mari Opũ mera mucubirique, arĩ gojañumi Pablo

¹ Eropirã yũ acawererã, yũ mahinirã, buriġã yũ ġuñarã, yũre mucubiricũ iirã, mũa ġuñaturadiro dopa ta mari Opũre buriġã ġuñaturaniquique mũa.

² Ire wereġura mũare Evodiare, Síntique sãre: Jesu yarã nome àhraa mũa. Eropirã mũa game dũyazorire duhu õaro mera árĩricũ árĩque mũa basi. ³ Mũpũ diaye ta yũ wapi gohra àhraa. Mũ sãre wereġura: Erã nome yũ mera, Clemente mera, gajirã yũ wapicũrã mera mohmeama õari

buharire gũa buhecũ. Goãmũ erã waĩ sãre gojatutuhañumi ãgũa yapũgue. Ʋmuri nũcũ ojocariburire ãgũa onirã waĩre ãgũa gojaturipũgue gojatutuhañumi erã waĩ sãre. Eropigũa erã nomere bosaque mũhũa.

⁴ Mũa árĩpehrerã Ʋmuri nũcũ mari Opũa mera mucubirique. Dipaturi ta weregũara daja: Mucubirique. ⁵ Ōaro iiniguicãque mũa ðaro iinirã árĩrare árĩpehrerã masa ãhamasiborore. Mari Opũa Cristo ãgũa ariboro merogã dũhyaa.

⁶ Mũa árĩricũre ne bũjawere guñaricũbircãque. Mũa guñaricũ bũjawererire Goãmũre ðaro werepehocãque. Eropirã ãgũre ðaro serẽque. Eropirã mũa serẽrã ãgũre “Ōhaa,” arĩque ãgũre. ⁷ Mũa eropiicũ, ðaro árĩcũ guñaricũro mariro iigũcumĩ Goãmũ mũare. ãgũa eropa iiri ðataria. I mari ðaro árĩri ðataria. Eropiro Jesucristo yarã mari árĩcũ marire ðaro árĩcũ iigũcumĩ Goãmũ. Marire ðaro sĩporãcũcũ iigũcumĩ. Eropigũa bũjawererire guñaniguicãcũ iisome ãgũa marire mari ãgũre serẽra pũhrũ.

Ōarire pepique, arĩ gojañumi Pablo

⁸ Acawererã, ire weretubu iiaa mũare. Queoro árĩrire, masa erã umupeorire, ðaro iirire, ñero marirore, sũarire, masa “Ōari ãhraa,” erã arĩrire pepique mũa. Ōatariari iri árĩcũ iripũre pepique. Masa ðarire ãarã erã mucubiririre mũa sã mucubiri pepique. Iri árĩpehrerire guñaque irire mũa iiboro dopa.

⁹ Mũare yũ buhediro dopa ta eropa ta iiniguicãque mũa. Eropirã yũre ãhacũque mũa. Mũa

eropa iicũ Goãmũ mũare õaro árĩcũ iigu mũa mera árĩgũcumĩ.

Filipo majarã Pablore erã orare wereñumi ĩgu

¹⁰ Dohpague tamerare yoara pũhrugue mũa dipaturi yũre guñarã mũa itamurare mucubiria. Eropa mucubirigũ mari Opũ Cristore “Õhaa,” arãa. “Yũre cãdijia wabũ mũa,” arĩbeaa yũhũ. Iribojeguere yũre itamudiaquerẽ itamumasibirinirã árĩbũ mũa. ¹¹ Yũre mũa itamurare weregũ “Yũre dũhyaa dohpa,” arĩ werebu iibeaa yũhũ. Mũare gajinore gamegũ eropa arĩgũ iibeaa. Yũ opari mera árĩmasia yũhũ. ¹² Gajinore moogu sã õaro árĩmasia yũhũ. Eropigũ baja opagu sã õaro árĩmasia yũhũ. Õmuri nũcu oaboagu sã oare nũgapoa waca. Yapigũ árĩgũ sã õaro árĩpoa waca. Dabero opagu sã árĩpoa waca. Yũre gajino maricũ sãre õaro árĩpoa waca. ¹³ Cristo yũre turacũ iigu mera árĩpehrerire yũ eropa warire ii bocatĩumasia yũhũ. ¹⁴ Yũ eropa árĩpoadigũ árĩquerecũ ta yũ ñero taricũ mũa itamurã yũre õaro iiabũ mũa.

¹⁵ Õari buherire yũ buhediacũ Macedonia yeba mũa ya yeba árĩdigũ yũ wacũ gajĩ maca majarã Jesu yarã yũre itamubirama. Mũa dihta yũre itamuabũ. Irire masia mũa. Mũare yũ buhecũ yũpũre mũa itamucũ mari yujuropa ta Cristo yare iirã iiabũ. ¹⁶ Eropirã Tesalõnicague yũ árĩnicũ ĩarã yũre itamubeobũ. Yujuyerisuburi yũre dũhyacũ ĩha yũ gamerire obeoabũ mũa. ¹⁷ Gajinore serẽgũ eropa arĩgũ arĩbeaa. Gajirãre mũa itamucũ Goãmũ mũare õaro itamugũcumĩ. ĩgũre mũa itamuri waja Goãmũ

mũare ĩgu õaro iicũ gahmea yũhũ. Mũa eropa itamurã guñaturarã wacũ sãre gahmea yũhũ. Eropigũ yũre mũa itamurare guñacũ iiaa mũare. ¹⁸ Dohpaguere yũre õaro opehoabũ mũa. Yũ gamera tauro ohabũ mũa yũre. Yũre Epafrodito mera mũa obeora pũhrũ gajino ne dũhyabeaa yũre. Mũa yũre ora Goãmũre ora iro dopa ãhraa. Yũre mũa ora Goãmũre õaro suacũ iiaa. ¹⁹ Jesucristo marire õaro iidĩ árĩmi. Eropigũ árĩpehřerire mũare dũhyarare ogũcumi mari Pagũ mũare. Õatariari ĩgu oparire ogũcumi. ²⁰ Ʋmũri nũcũ mari Pagũre Goãmũre umupeorã. Eropa ta iiporo.

Pablo õadorepũ

²¹ Árĩpehřerã Goãmũ mera árĩrã Jesucristo yarã õaporo. Mari acawererã Jesu yarã yũ mera majarã sã mũare õadorema. ²² Árĩpehřerã õ majarã õarã Jesu yarã õadorema. Roma majarã weca opũ ya wihi majarã tamera bũrigã õadorema.

²³ Mari Opũ Jesucristo mera mũare õadorea. Eropa ta árĩniguicãporo. Iripẽta ãhraa.

Goãmu Yare Wereripu
Desano: Goãmu Yare Wereripu New Testament
copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022
17771afc-c309-57fd-9ff3-2d5a0cd59ff1